

四庫全書

集部

欽定四庫全書

大全集卷十六

明 高啟 撰

五言絕句

觀軍裝十詠

胄

黃金冒虎頭乍免走豪酋還有從容處綸巾按壘遊

鎧

細弗鏤文銀高城日照鱗擺來曾攪陣一鏃不傷身

毒

髮亂野牛驚神專大將營師行當禡祭壇下戮番生

刀

大食購千金妖精泣太陰燈前開匣看無限許君心

弓

燕角號良材樓煩擘未開秋風懸臂出何處一鷁來

箭

流星逐飛羽，鏃利能穿孔。
三發定邊歸，箛中休滿插。

麾

彩帛曳長虹，悠悠卷塞風。
三軍齊陷陣，應在一揮中。

矛

畫榦似蛇長，誰論半段鎗。
日斜親鬪罷，高宴卓沙場。

袍

雕錦剪花圓，三邊總認看。
尋常不肯著，風雪念兵寒。

馬

羅帕覆春風連鞍賜有功蹄高騎得稱身出萬軍中

獅子林十二詠

獅子峯

風生百獸低欲吼空山夜疑是天目巖飛來此山下

含暉峯

演漾弄清暉江山秋斂霏我吟康樂句日暮澹忘歸

吐月峯

四更棲鳥驚山白初上月起開東閣看正在雲峰缺

立雪堂

堂前參未退立到雪深時一夜山中冷無人祇自知

卧雲室

夕卧白雲合朝起白雲開惟有心長在不隨雲去來

問梅閣

問春何處來春來在何許月墮花不言幽禽自相語

指柏軒

清陰護燕几中有忌言客人來問不應笑指庭前柏

玉鑑池

一鏡寒光定微風吹不波更除荷芰影放取月明多

冰壺井

圓甃夏生冰光涵數星冷窓有定中僧休牽轆轤綆

脩竹谷

翠雨落經林林鳩午鳴後筍出恐人來編籬遮谷口

小飛虹

初看卧波影應恐雨崇朝過澗尋師去端知度石橋

大石屋

混沌復輪囷全無斧鑿紋門臨五湖水坐納四山雲

題雜畫

空山萬株木靄靄秋多晦屋在白雲中人歸白雲外

其二

欲尋江寺僧渡口孤帆發落日浦風生不畏春潮濶

其三

叢蒲亂石間水急魚難罩欲去尚殘陽看山一停棹

其四

風急楚江波佳人罷采荷離舟孤宿處淚少夜猿多

其五

孤柳影婆娑路入秋溪暮誰家繫榜來應待歸人渡

其六

驢影夕陽催空山不見梅愁腸如客路一日幾縈迴

其七

夕陽數峰遠靄靄江南思煙外有鐘聲山僧獨歸寺

其八

橋迴綠水斜春樹隔煙霞隱處誰云淺千峰只一家

其九

日出溪霧黃風迴不成雨何處趁墟人侏僂竝沙語

其十

遠岫浹煙光斜陽在釣航衆漁歸已盡獨自過寒塘

其十一

柳葉散空塘菊花明廢苑日暮問垞南舟行何近遠

其十二

山禽欲定棲竹風苦難靜殘雪墮驚梢脩脩一窓冷

和楊禮曹刺客三詠

推

袖藏出屠市一揮報公子誰言上將雄不異孤豚死

匕首

購自徐夫人欲堪秦皇帝銅柱火光飛奇鋒非不利

筑

王醉不知音亭前殺聲起勿輕無目人能為有心鬼
得家兄在遠消息

家將遠人信復報遠人知世亂書難得開緘勝見時
其二

幾日看回鴈今朝尺素開應知在天末亦望弟書來
其三

歲晚各離家憐兄去路賒書來約歸近同看故園花
其四

江上有歸舟傳兄在石頭知安雖暫喜念遠更成愁

為外舅周隱君題雜畫

斜陽傍釣船秋色滿江天彷彿吾家近沙村落鴈邊

其二

白鶴忽飛還松杉靄然暝明月出溪橋照見支筇影

其三

風雨過蒼嶠秋色渺江海白鷗期不來沙上人相待

其四

落葉帶回吹荒筠冒幽石池上鳥鳴時閒齋掩秋夕

其五

山深嵐氣寒高齋掩窓卧林間踏葉聲知有樵人過

效陰常侍

滿江煙水綠幾里到巴州音書不堪寄一寄一沈浮

歎牆下草

青青牆下草經霜未枯槁雖是見春遲還免逢秋早

草堂梵僧

禮塔老番僧唐言已漸能夜無還國夢石室坐懸燈

新月

纖纖掛柳西斜影低窺閣黃昏難久看初生是將落

尋胡隱君

渡水復渡水看花還看花春風江上路不覺到君家

西寺晚歸

遠寺別僧歸隨鐘出煙嶺夫呿竹林間斜陽見人影

淵源堂夜飲

懸燈照清夜葉落堂下雨客醉已無言秋蛩自相語

和陳左司夜泊桐江

月出釣臺樹長灘秋更喧渾如宿巫峽唯少一聲猿

過獅子林

雨餘鳥語涼斜陽竹深見頻來非看花借讀高僧傳

薔薇露盃手

蠻估海帆迴銀鬕玉汞開盃餘香滿手恰似折花來

西陂

芳草水東西春風路欲迷歸時不覺晚山與夕陽低
園中梨花唯開一枝

闌外見春遲朝來雪一枝不知初發處誤道已殘時
江上酒家

門戶映垂楊春槽酒聲瀉幾度望高帘歸帆雨中下
過舊送別處

前時送畫船西港柳株邊別處愁猶在鴛鴦不肯眠
懷陳寅山人時居西山昭明寺

聞看西澗月秋閣與僧開正是相思夜鐘聲若處來

畧上人房竹

幽篠半梢橫山窓颭月明上人禪定久不怕有秋聲

聞鴈

江寒月黑夜定宿蕪葭裏叫叫過燈前却是誰驚起

晚坐水上

潭島去何深斜陽樹半陰偶來臨水坐非有羨魚心

聞謝恭夜詠詩

我非李太白君是謝楊兒夜半江樓雨高眠聞詠詩

題馬遠畫酴醾

池冷畫闌幽芙蓉伴晚愁金盤承露重彷彿漢宮秋

黃葵

春晚獨餘芳風回帶酒香美人偏愛看因似御衣黃

余客雲陳山人居西山相望因有懷寄贈

深竹晝鳴鳩微涼滿寺秋老僧雖不在風雨自相留

睡足

風雨落梅村鳩啼正掩門今朝無事役睡足亦君恩

題雲林小景

歸人渡水少空林掩煙舍獨立望秋山鐘鳴夕陽下

題芭蕉

叢蕉倚孤石綠映閒庭宇客意不驚秋瀟瀟任風雨

春溪獨釣圖

春水鰕魚肥垂綸坐斷磯羊裘人易識好著舊蓑衣

池亭

虛檻枕池波閒凭看浴鷺秋荷知幾葉添得雨聲多

聞鐘

日暮遠鐘鳴山窓宿鳥驚楓橋孤泊處曾聽到船聲

桂花

風露浥清香清陰別院涼誰能呼白鳳花下舞霓裳

鴈

初到別胡沙樓頭度影斜江南秋月好隨意宿蕪葭

紅葉

霜深滿林紅蕭疎夕照中曾供寫秋怨流出未央宮

秋雨

瑟瑟復蕭蕭燈前滴此宵秋聲自難聽況復在芭蕉

月夜飲酒

月照綠樽深清歌桂樹陰嫦娥留伴我莫向畫樓沈

遊山

自著林間屐來聽石上琴老僧留客久西嶺日將沈

聞笛

橫吹發哀聲江樓月正明伊州不堪聽都是故園情

秋聲

砧韻雜鳴蛩梧邊雨帶風千聲秋作意都入夜窓空

秋夜宿僧院

竹動鵲頻驚秋河閣外橫談禪貪坐久莫遣曙雞鳴

登樓望虎丘

秋霽倚層樓孤峯是虎丘香臺紅樹裏佳處記曾遊

外舅周隱君齋竹

秋思與秋聲聞齋對夕清幽人夢回處煙鳥月中鳴

寧真道館夜觀茅隱君畫

看山如見君君家在山下仙館憶君時明燈對圖畫

竹林高士圖

竹深斜日在獨鶴見扉開誰顧閒居者惟應二仲來

詠水邊桃花

一片欲隨流殘妝照影愁誰來唱桃葉風雨送離舟

芭蕉美人圖

琴罷詠春朝餘醒吸露銷詩成無落葉聊為寫芭蕉

王主簿小園

夏葉風苗長秋瓜雨蔓新誰言趨府客却似灌園人

晚尋呂山人

小艇載琴行松花落晚晴君家最可認隔樹有書聲

黃氏延綠軒

葱葱溪樹暗靡靡江蕪濕雨過曉開簾一時放春入

喜從兄遠歸

聞汝歸舟到相迎只恐遲方當見時喜還憶別時悲

送人遊湘中

離恨挂帆檣隨君遠入湘飛花蕩春影江水不勝長
訪丁校書不至

獨坐無與語出門聊訪君空回轉惆悵芳草日將曛

答陳山人

賣畚君當返修琴君已歸無為嫌寂寞世事意多違

杏園

春紅雨後繁孤墅啼鶯曉聞道曲江園遊人近來少

瓜圃

傷瓜莫傷蔓傷蔓子生稀留待經霜露盈筐採得歸

菊蹊

獨行林下路望望南山暮無酒掇英嘗寒香已零露

梅塢

春暗雲如雪難招落漠魂空林酒醒處月墮客敲門

題許瀾伯畫

望秋倚高閣隔江望層巘不見度僧歸烟深暮鐘遠

除夕客中憶女

別家非願久回首已徂年今夜寒齋雪何人聽折絃

歲暮

已嗟求道晚復省濟時難碌碌成何事天涯又歲闌

題攜琴訪友圖

孤騎復孤琴披嵐入澗陰遠尋君莫訝城市少知音

鴛鴦

兩兩蓮池上看如在錦機應知越女妒不敢近船飛
題張校理畫

寒色初凝野秋聲忽在林遙山不能見祇為晚烟深
題湘南雨意圖

南禽暮啼起門掩湘祠裏脈脈半江陰春雲與春水
題扇上竹枝

寒梢雖數葉高節傲霜風寧肯隨團扇秋來怨篋中
題李迪畫夫

護兒偏吠客花下卧晴莎莫出東原獵春來兔乳多

天平山五丈石

勢危撐月墮影瘦倚雲平彷彿峰頭井蓮花一半生

別呂隱君

孤舟晚溪口欲去重回首不忍別青山況此山中友

林下

樹涼山意秋雲澹川光夕林下不逢人幽芳共誰摘

不寐懷徐記室

齋寒掩孤燭城遠沈雙杵憶爾忽長吟驚散牀頭鼠
雪中自雲巖晚歸西村客舍

乍與諸僧別還依一叟鄰柴門閉風雪誰候暮歸人

其二

隔浦煙墟遠侵沙雪樹稀行人緣底事不及鳥先歸
立春前十日寄會稽周軍咨

的的玩芳樹依依懷遠人千山雖隔郡十日共逢春

柳燕圖

柳上銜蟲立春風似有情和枝吹裊裊方覺爾身輕

隔簾聞歌

葉逐散聲飛湘雲隔妓衣誰能偷卷看認是小叢非
訪張司馬不值書園亭壁

亭午鵲鳴雨果園花已稀偶來因忘去非待主人歸
壺中挿緋碧桃花既而碧桃先落

白嫩倚紅嬌朝看訝獨飄應緣霞氣暖烘得雪先銷
優人李州僑乞米

曾稱富貴客粉墨尊前面憔悴立窮途渾非舊時見

其二

戲場鼓笛靜人無太平樂爾莫怨飢寒梨園亦零落

綵索

臂頭長命縷百結更雙蟠怕有痕生肉教依玉釧寬

釵符

靈篆貯紗囊薰風綠鬢傍從今能鎮膽不怯睡空房

燒筍

幽人嗜燒筍出土不容長林下孤煙起風吹似竹香

江寺雨中訪杜二

幾日纜歸舟同君野寺遊舊懷言未盡不是雨相留

寒夜與家人坐語憶客中時

茶屋夜燈青竹庭寒雪白不對室中人依然去年客

題楞伽山寺壁

惆悵空山裏寒梅應自開雪中何處覓須待雪晴來

贈僧本空

了性本來空遊方不復東月明秋澗靜趺坐一山中

聞霰

初訝驚沙過復疑疎葉落寒霰夜聞時窓空人寂寞

江上漫成

春色到江濱江花樹樹新行吟憔悴客誰道亦逢春

雨中過玉遮山

松頭急風迴飛雨不到面何處豁清愁千山一人見

其二

尋鐘入蒼茫一澗復一崦落葉去方深山扉雨中掩

畫花鳥

語倦立還敲花垂裊裊枝美人妝閣靜斜日下簾時

種瓜

絲絲花蔓紫颯颯風煙灑秋來予正多不似黃臺下

摘瓠

輪囷卧霜露秋曉摘初歸自笑詩人骨何由似爾肥

懷蜀山人

靄靄衆山暝秋禽鳴澗竹知君高詠餘聽鐘掩窓宿

諸君會宿鶴瓢山房題畫賦詩予將赴召不得
預明日補題其上

偶趨蘭省召不預竹林歡山水圖中景明朝在路看

山中夜行

登隴日已沈出谷月初上夜行畏虎聞無奈車聲響

赴京道中逢還鄉友

我去君却歸相逢立途次欲寄故鄉言先詢上京事

泐禪師室中晚坐

綠陰欲滿寺禽鳴春雨餘
聊因簡牘暇窓下閱僧書

白葵花

素彩發庭陰涼滋玉露深
誰憐白衣者亦有向陽心

馬氏東軒

陽和受最多爽氣看應少
晞髮此窓前雞鳴海天曉

得家書

未讀書中語憂懷已覺寬
燈前看封篋題字有平安

期陳則不至聞宿清隱蘭若

幽禽雨中響門掩春塘綠思君暮不來應伴山僧宿

碧筩飲

綠觴卷高葉醉吸清香度酒瀉正何如風傾曉盤露

曉發山驛

風殘杏花曉馬上聞啼鳥茅店未開門山多住人少

焚香

斜霏動遠吹暗馥留微火心事共成灰窓間一翁坐

榴花

日炙態常醺香生若自焚夜來端午宴淡却美人裙

階前苔

莫掃雨餘綠任滿閒階路留藉落來花春泥免相汙

僧舍訪呂隱君為學上人題墨竹

山房竹雨過簾影霸春雲得與幽人會何殊見此君

題孫卿家小畫

高嶺冒層嵐疎林逗殘照何處覓孫登雲間聽長嘯

其二

前林遠杵歇別院疎鐘起行人與居人同在秋雲裏
久別幼文偶見其畫遂題

幾疊蜀山雲秋林半夕曛畫中藜杖者相見只疑君

題榮悴竹圖

嫩葉與殘枝相依暮雨時莫將榮悴看節在不曾移

叢竹圖贈內弟周思敬就題

窈窕復蒙茸千山萬竹中幽人夜驚起秋雨共秋風

題張來儀畫贈張伯醇

風起澗聲亂景寒雲氣深山人歸卧晚詩意滿秋林

次韻及禪師懷王水曹

千峰一寺遠雲滿跣趺處無客伴孤禪懸燈照深樹

其二

鐘動雲壑冷鶴歸人不歸應思躡金策同向海天飛

夜聞雨

窓燭冷殘夜聞蛩更聞雨秋館總多愁猶勝在羈旅

大癡小畫

溪水雖多曲舟行不憚賒山山秋樹赤猶復似桃花

吳仲圭枯木竹石

叢篠倚喬柯秋陰雨尚多風霜莫搖落留陰石邊莎

題倪雲林畫贈因師

含暉峰下路樹石盡垂藤欲認莓苔迹相尋行道僧

題徐山人畫贈內弟周思恭

複澗蕪重嶺雲嵐處處生君家還可認為有讀書聲

訪因師而師適詣余兩不相值

我去尋幽院師來訪小園休言不相見相見本無言

題畫贈別

扁舟暮歸去別路江南樹愁指楚山遙明朝望君處

龍門飛來峰

風吹峨嵋雲東依此山住我來不敢登只恐還飛去

待渡

渡子未迴舟立傍沙頭樹天寒雪欲來莫滯人歸去

西澗訪衍上人

日暮冒餘雪望烟西澗陰不因師住遠何事到山深

蔡村田家

田中耒聲歇煙火西林起獨立候歸人柴門夕陽裏

夢中作

悠悠衆擾去寂寂孤吟歇雨過滿窓涼高林上明月

要離墓

弱夫殺壯士誰敢嬰餘怒今日古城邊畊人肆侵墓

顧野王墓

南朝舊碑倒墓近樵蘓道應與讀書堆離離總秋草

卓筆峰

雲來初似墨鴈過還成字千載只書空山靈恨何事

硯池

山骨誰鑿破一泓自深黝醉後欲濡毫蜿蜒見蚪蚪

千人石

池上盤陀石千人列坐曾如今趺夜月唯有一山僧

五塢山

飛泉塢

山空響更遠雨過流還急餘沫灑迴風一林紅樹濕

修竹塢

色映溪沉沉秋雲生夕陰無限楚山意鶴鳴風滿林

丹霞塢

遙聞丹霞塢中有餐霞者絳彩發朝朝還同赤城下

白雲塢

雲開見山家雲合失山路聞語知有人欲尋已迷悞

芳桂塢

欲攀淮南樹人去山寂寞嫋嫋涼風生疎花月中落

芹

飯煮憶青泥羹炊思碧澗無路獻君門對案增三歎

蓴菜

紫絲浮半滑波上老秋風憶共香菰薦吳江葉艇中

芭蕉

靜掩綠陰行閒聽雨聲卧還有感秋詩窓前書葉破

中秋

此夕月華流應分一半秋誰能尋庾亮吹笛上南樓

九日


攜壺還采菊惆悵獨登高憶在詞林日華筵食賜餽

題畫贈許瀾伯

泠泠風中絃渺渺雲間鴻秋懷不可寫日暮青山空

病酒

日高頭未擲困卧對山花暫謝高陽侶窓間獨飲茶



大全集卷十六

欽定四庫全書

集部
大全集卷十七

詳校官庶吉士

臣李傳熊

中書臣劉源溥覆勘

總校官原任中允臣王燕緒

校對官中書臣李斯咏

謄錄監生臣李文杞

欽定四庫全書

大全集卷十七

明 高啟 撰

七言絕句

馬周見太宗圖

封事朝聞夕拜官
新豐無復客衣寒
書生未有鳶肩相
只說君臣際會難

聞舊教坊人歌

渭城歌罷獨淒然不及新聲世共憐
今日岐王賓客盡江南誰識李龜年

山中別寧公歸西塢

一上香臺看落暉沙村孤樹晚依微
老僧不出青山寺只有鐘聲送客歸

秋柳

欲挽長條已不堪都門無復舊毵毵
此時愁殺桓司馬暮雨秋風滿漢南

送賈麟歸江上

別淚紛紛逐斷猿
貧交無贈只多言
離愁正似蘼蕪草
一路隨君到故園

秋夜同周著作宿婁浦

小廨寒依竹浦雲
酒闌相對說離羣
一聲新鴈誰先聽
今夜江南我共君

方崖師畫

畫圖忽見白雲峰
茶屋香臺樹幾重
身若在師行道處

晚來唯訝不聞鐘

送陳秀才歸沙上省墓

滿衣血淚與塵埃
亂後還鄉亦可哀
風雨梨花寒食過
幾家墳上子孫來

送呂卿

遠汀斜日思悠悠
花拂離觴柳拂舟
江北江南芳草遍
送君併得送春愁

答陳校理尋花已落之作

君來春去不相期
空有新愁繞舊枝
總得花看能幾日
最難留惜是芳時

與諸君飲吳別駕園

春來幾度醉無涯
不似今朝向汝家
四海弟兄俱在座
好風吹出棣棠花

舟中聞歌

水柵孤燈照客舟
江南誰解唱甘州
尋常醉賞尊前曲
何事今朝聽得愁

題雨竹畫

巫峽雲連湘水低
行人路滑畏深泥
不見朝陽鳴鳳至
春陰日日鷓鴣啼

挽楊隱君

纔歌招隱又招魂
故老子今有幾存
他日我來應下拜
寒山流水竹間墳

春思

愁兼楊柳一絲絲
客舍江南暮雨時
自入春來才思減

杏花開過不題詩

入郭過南湖望報恩浮圖

雨過春陂柳浪香
布帆歸緩怕斜陽
漁人為指江城近
一塔船頭看漸長

廢宅芍藥

昔年花發要人催
今日無人花自開
猶有園丁憐國色
時容閒客借看來

登江閣遠懷徐記室與杜進士同賦

憑闌兩客怨斜曛此日同吟只欠君江閣雖高猶不見
幾重山水幾重雲

夏夜宿西園酒醒聞雨

飛蟲繞燭夢迴遲荷葉齊鳴雨一池不為素紉猶在手
定疑秋夜乍寒時

其二

人睡蕭蕭院落空未秋愁已怯梧桐夜長猶幸西軒雨
一半聽時在醉中

倦繡圖

翠絲盤葉碧玲瓏
小萼花鋪茜縷紅
夢裏鴛鴦留不得
分明却在繡牀中

聞笛

橫吹纔聽淚已流
寒燈照雨宿江頭
憑君莫作關山曲
亂世人人易得愁

慰周著作悼亡

笑披紗扇憶當年
只有卿卿最得憐
今日料應花不住

夜燈相伴室中禪

山寺冒雨還西郭

粟葉翻翻滿寺秋
出門風雨未全收
自慙騎馬非閒客
可是山僧不解留

蘇李泣別圖

丁零海上節毛稀
幾望南鴻近塞飛
泣盡白頭相別淚
少卿留北子卿歸

江上偶見

阿姬不畏晚寒多綠舫紅衣柳下過滿浦秋荷已零落
如何猶唱采蓮歌

過保聖寺

隔江煙霧隱樓臺遠逐鐘聲放艇來亂後不知僧已去
幾堆紅藥寺門開

王七招飲余遊紫藤塢值雪失期

孤舟山水雪晴時看到梅花幾萬枝東崦題詩西崦醉
等閒忘却故人期

江上送客

春風江上蕩舟過垂柳垂楊拂浪波惆悵今年頻送客
長條欲折已無多

期諸友看范園杏花風雨不果

欲尋春去怕春休又值春陰不得遊寂寞西園風雨裏
杏花比客更多愁

宮女圖

女奴扶醉踏蒼苔明月西園侍宴迴小夫隔花空吠影

夜深宮禁有誰來

逢張架閣

花落江南酒市春
逢君歸騎帶京塵
一盃相屬成知己
何必平生是故人

山中春晚聽鳥聲

子規啼罷百舌鳴
東窓卧聽無數聲
山空人靜響更切
月落杏花天未明

與親舊飲散出抵城西客舍賦寄

吳王廢苑草青青一騎今朝發野亭誰道別君行路遠
去時人醉到時醒

過山家

流水聲中響緯車板橋春暗樹無花風前何處香來近
隔崦人家午焙茶

雲山樓閣圖

碧樹香臺錦繡連畫師應見亂離前如今風景那堪寫
廢寺空山鎖暮烟

始自西山移寓江渚夜聞雨有作

客身移宿浦雲東孤館殘燈與舊同
夜靜空江無落葉雨聲驚不似山中

晚過浦西橋

春水何長春日短沙鴨交眠綠莎暖
晚過橋西不見人野梅零落江雲斷

歎庭樹

偶移弱質傍庭臯風露離離已便高
翻笑園中栽樹者

十年猶未出蓬蒿

雨中春望

時在園中

郡樓高望見江頭
油壁行春事已休
落盡棠梨寒食雨
只應啼鳥不知愁

夜齋見螢火

拂竹緣莎復點苔
夜窓無月見飛來
舊書亂後都拋却
懶就微光更展開

湖上見月憶家兄

望月思兄意轉迷孤帆應宿楚雲西夜深愁向湖邊立
為有寒鴻相並棲

逢吳秀才復送歸江上

江上停舟問客蹤亂前相別亂餘逢暫時握手還分手
暮雨南陵水寺鐘

十宮詞

吳宮

芙蓉水殿屨廊東白苧秋來不耐風教得君王長夜醉

月明歌舞在舟中

楚宮

雨去雲來十二峯
渚宮樓閣暮重重
細腰無限空相妒
不覺瑤姬夢裏逢

秦宮

宮閉驪山靜
管絃翠華巡
狩去經年
掖庭無用恩
難報願上蓬萊采藥船

漢宮

酒醒金屋曙河流願賜銅盤一滴秋他日君王作仙去
瑤池猶幸得同遊

魏宮

翡翠明珠入貢頻承恩長占鄴宮春至尊莫信陳王賦
那得人間有洛神

晉宮

盡日南風永巷開羊車去後玉堦苔誰知天上無塵地
亦有城南小吏來

齊宮

帖地黃金襯襪羅苑中市罷合笙歌有人解誦西京賦
添得樓臺火後多

陳宮

春風臺閣繡參差狎客爭陳壁月詞幾度醉濃嬌不起
景陽樓上曉鐘時

隋宮

五斛青螺一日銷迷樓深貯萬妖嬈衆中誰解留車駕

風浪如山莫渡遼

唐宮

玉笛聲殘禁漏長
雲屏月帳醉焚香
五王宴罷皆歸院
大被空閒一夜涼

次韻春日謾興四首奉酬外舅達翁

老去風情似樂天
恨無張態抹朱絃
一春酒病稀遊賞
啼鳥鶯花共悵然

其二

水邊簾幙遠籠花遊女時時出浣紗記得橫塘沽酒處
畫船明月載琵琶

其三

雨多池館草氈氈酒色寒銷舊舞衫燕子似憐花落地
殷勤長帶軟泥銜

其四

菖蒲葉老芷花新池暖鴛鴦護水紋不上高樓無遠恨
江南春盡草如雲

回文

風簾一燭對殘花
薄霧寒籠翠袖紗
空院別愁驚破夢
東關井掛夜啼鴉

春日懷江上

一川流水半村花
舊屋南鄰是釣家
長記歸篷載春醉
雲籠殘照雨鳴沙

其二

新蒲正綠鳧鳴水
沒魚梁宿雨晴
看近清明沈種日

野人何事不歸耕

醉仙圖

酒滿長生癭木瓢
花開仙館宴春宵
飛瓊何事堅辭飲
應恐清都誤早朝

觀奕圖

錯向山中立看棋
家人日暮待薪炊
如何一局成千載
應是仙翁下子遲

江村即事

野岸江村雨熟梅水平風軟燕飛回小舟送餉荷包飯
遠旆招沽竹醞醅

偶睡

竹間門掩似僧居白豆花疎片雨餘一榻茶煙成偶睡
覺來猶把讀殘書

舟歸江上過斜塘

漫漫村塘水沒沙清明初過已無花春寒欲雨歸心急
嬾駐扁舟問酒家

西齋庭前海棠

寂寥銀燭與金盤睡足簾前怯曉寒不是詩人賞幽獨
雨中深院有誰看

次韻張仲和春日漫興

蘓小墳前柳似煙鞦韆人靜夕陽天獨騎款段尋詩去
嬾逐看花衆少年

與內弟周思敬晚過鴈蕩僧舍

同過溪橋日欲晡遠林殘葉似栖烏照公院裏堪留宿

已有梅花有酒無

白傅湓浦圖

相逢淪落總天涯
舟泊湓江近荻花
逐客青衫自多淚
傷心不用怨琵琶

陶穀驛亭圖

酒闌使騎趣歸時
羞殺江南一曲詞
借問驛亭相見者
風流何似党家兒

客夜聞女病

歲盡歸期尚杳然不知汝病復誰憐
隔鄰兒女燈前笑客舍愁中正獨眠

秋江晚渡圖

鷓鴣飛盡一洲蘋
帆帶秋雲度遠津
底事愁看畫中景
昨朝曾送渡江人

夜中有感

少壯無歡似老時
身窮寧坐苦吟詩
卧思三十年來事
一半間關在亂離

其二

僊僕厨中睡已安
吹燈呼起冒霜寒
酒醒無限悲歌意
不覓書看覓劍看

徐記室謫鍾離歸後同登東丘亭

同上高亭一賦詩
喜逢君是謫歸時
不然此日登臨處
應望天涯有遠思

將赴金陵始出閶門夜泊

烏啼霜月夜寥寥
回首離城尚未遙
正是思家起頭夜

遠鐘孤棹宿楓橋

其二

煙月籠沙客未眠
歌聲燈火酒家前
如何纔出閭門宿
已似秦淮夜泊船

舟次丹陽驛

沽酒來尋水驛門
鄰船燈火語黃昏
今朝始覺離鄉遠
身在丹陽郭外村

正月十六日夜至京師觀燈

天街爭唱落梅歌
絳闕珠燈萬樹羅
莫笑遊人來較晚
春風還似昨宵多

夜聞雨聲憶故園花

帝城春雨送春殘
雨夜愁聽客枕寒
莫入鄉園使花落
一枝留待我歸看

早至闕下候朝

月明立傍御溝橋
半啓宮門未放朝
騎吏忽傳丞相至
火城如畫曉寒銷

春日寄張祠部

烏衣巷口燕來時
楊柳風多颭酒旗
遠客金陵遊伴少
看花慙比去年遲

左掖作

小殿珠簾散柳絲
東宮初退講筵時
不材未敢修封事
把筆閒題應教詩

雨中登天界西閣

青山樓閣楚江東
身在蒼茫晚色中
故國自遙難望見

不關春樹雨溟濛

吳中親舊遠寄新酒

雙壺遠寄碧香新
酒內情多易醉人
上國豈無千日釀
獨憐此是故鄉春

其二

為念春來客思悲
欲教一醉對花枝
那知飲量新來減
不似江亭看妓時

宿圓明寺早起

客起燈前夢尚迷滿城殘月曉峰西
應知野寺非山店只聽鐘聲不聽雞

送葛省郎東歸

金陵女兒踏春陽金陵客子正思鄉
一盃況復送君去目斷飛花江水長

其二

桃葉渡頭聞唱歌孤帆欲發奈愁何
君歸是我來時路山水無多離思多

四月朔日休沐雨中

送春風雨苦潺潺得告今朝免綴班
卧聽鳩啼花落盡
此身如在故園閒

戴叔鸞入江夏山圖

歸隱初辭薦辟章西風黃葉滿車箱
青牛只識山中路
不是無心向洛陽

送哲明府之新淦

花落春衫試剪裁石頭城下楚帆開
憑誰為報清江吏

麥雉鳴時縣令來

逆旅逢鄉人

客中皆念客中身
唯汝相逢意更親
不向燈前聽異語
何由知是故鄉人

寄丁二侃

江頭斜日草初曠
目斷歸鴻隔楚雲
舊宅因君相近住
每思家處即思君

題虞文靖公書所賦鶴巢詩後

玉堂罷直鬢如絲
華蓋岡頭戴笠時
丁令去來滄海變
人間零落鶴巢詩

客中憶二女

每憶門前兩候歸
客中長夜夢魂飛
料應此際猶依母
燈下看縫寄我衣

晚晴遠眺

楚天無物不堪詩
登眺唯愁動遠思
秋樹江山人別後
夕陽樓閣雨晴時

寄徐記室

徐久客京師余至已東還

惆悵江東日暮雲
我來君去苦離羣
不知此日君思我
還似當時我憶君

寄家書

時客越城

底事鄉書累自修
路長唯恐有沈浮
還憂得到家添憶
不敢多言客裏愁

期來卿見過
因出失值寄詩謝之

非關遠出負幽期
自是江邊枉棹遲
誰道空迴君恨切

未應如我到家時

宿蟾公房

一禽不鳴深樹煙
明月下照高僧禪
獨開西閣詠清夜
秋河欲墮山蒼然

陌上見梅

陌頭一樹帶風沙
零落寒香日欲斜
車馬紛紛誰暇看
當年只合種山家

東歸至楓橋

故人當日送登畿此地停舟醉落暉慙愧臨河舊攀柳
尚留青眼看人歸

江行

家家魚網映迴橋春水初生沒樹腰客路江南烟雨裏
綠蕪芳草恨迢迢

戲和徐七見寄卧聞鄰槽酒聲之作

春瀉鄰槽入夜聞遠疑泉響隔松雲題詩為問醒眠客
幾滴還能醉得君

見燕至

初來如報社前春
好宿茅簷伴客身
莫入江南舊庭院
杏花風雨總無人

背面美人圖

欲呼回首不知名
背立東風幾許情
莫道畫師元不見
傾城雖見畫難成

對梨花

素香寂寞野亭空
不似鞦韆院落中
卧對一枝愁病酒

清明今日雨兼風

和楊余諸君在謫中憶往年西園聽歌

花落名園罷醉遊故人無復舊風流
異鄉莫歎無歌聽若使聞歌意更愁

重過南寺尋悟公不值

我是鈞天夢覺人憶來松下似前身
老僧何去袈裟在落葉斜陽滿室塵

過流通院

僧懶開門見客遲
空林流水日斜時
欲留詩句知曾過
我後來看竟是誰

其二

橘柚林中薜荔垣
幽尋幾度入秋園
雖然老衲無聞見
猶勝相逢俗客言

聞人唱吳歌

楚人不解聽吳歌
我獨燈前感慨多
記得通波亭下路
畫船歸去雨鳴荷

雨中過山

春雲掩靄澗奔渾風雨行人過一村不似山家深竹裏
乳鳩啼午未開門

讀史

晏嬰

一裘身著久經年祿米分炊幾戶烟盡說大夫能養士
却于尼叟惜封田

商鞅

徒誇關戟衛華軒渭水何能洗衆冤想到出亡無舍日
應思不用趙良言

儀秦

二子全操七國權朝談從合暮衡連天如早為生民計
各與城南二頃田

蘭相如

危計難成五步間置君虎口幸全還世人莫笑三閭懦
不勸懷王會武關

平原君

朝歌長夜館娃春總為妖姬戮諫臣何事邯鄲貴公子
能因嬖者殺佳人

范雎

紛紛傾奪苦多謀得勢還懷失勢憂丞相不須嗔蔡澤
此時當問老穰侯

范增

不識興王自有真尊前示玦謾勞神當時誰道翁多智

不及王家老婦人

張子房

不握兵權只坐籌苦辭萬戶乞封留縱令不早尋仙去
天子終無賜醢謀

賈誼

凶吉何由鵬鳥知才高暫謫未須悲秋風不灑梁園淚
宣室寧無再見時

董仲舒

早奏文章直殿廬茂陵還復訪遺書寂寥猶抱春秋傳
誰問江都老仲舒

李廣

猿臂將軍本自賢灞陵醉尉竟難全不聞當日王孫貴
重到淮陰賞少年

田千秋

功名何必任才謀遇合逢時便可收高寢郎官頭已白
一言悟主即封侯

王章

外家勢重直言稀
京兆書陳蹈禍機
合浦老妻須莫怨
絕勝卧病死牛衣

揚雄

執戟三朝老從臣
從來無意據通津
如何晚把玄經筆
却為新都著劇秦

馬援

浪泊歸時憶少遊
炎蒸終復困壺頭
漢庭豈少英年將

衰老南征苦自求

袁安

洛下人家懶去干
閉門僵卧雪漫漫
立朝不附薰天勢
應為平生耐得寒

荀彧

晚惜彤弓勢已難
空期魏武作齊桓
猶緣死沮奸雄意
竊鼎遷延到五官

孔明

莫恨流星墮渭濱
出師未捷已沾巾
天應留取生司馬
歸作他年取魏人

張昭

長史難忘昔受遺
塞門投老苦憂時
孝廉猶有當年意
不遣真從介子推

王猛

軍門被褐異隆中
抱策歸秦竟事戎
猶喜遺言真有識
不教飲馬向江東

謝安

談笑新亭鼎不移坐籌強虜在枰棋平生事業從容得
莫道無心屐折遲

韓子

自古南荒竄逐過佞臣元少直臣多官來瀧吏休相誚
天要潮人識孟軻

題宋徽廟畫眉百合圖

百合無殘六合塵汴宮啼鳥怨無人不知風雪龍沙地

還有圖中此樣春

題湘君圖

祠前脩竹楚山青
風珮時來過洞庭
月夜莫彈瑤瑟怨
夫君不見有誰聽

題洛神圖

晚步芳洲拾翠歸
不愁風浪濕仙衣
彩雲一滅無尋處
應逐陳王去馬飛

二喬觀兵書圖

共憑花几倦新妝
玄女陰符讀幾行
銅雀那能鎖春色
解將奇策教周郎

風雨早朝

漏屋雞鳴起濕烟
寒驢難借強朝天
却思春水江南岸
閒聽蓬聲卧釣船

雨中曉卧

井桁烏啼破曙烟
輕寒薄被落花天
聞人晴日猶無事
風雨今朝正合眠

其二

香斷牀幃冷未開
雨窓寥落滿樵苔
休輕一枕江邊睡
拋却腰金換得來

久雨

水長已到折磯頭
江天雨來殊未休
鷓鴣鵲鵲曉爭喜
楊柳杏花春自愁

閏三月

不須愁寫送春詩
花比常年落最遲
添得一分春色在

天應憐我惜芳時

晚立西浦渡

髣髴絲微映釣絲輕水葉驚風細浪生誰見晚涼人立處
數株楊柳一蟬鳴

題孟浩然騎驢吟雪圖

西風驢背倚吟魂只到龐公舊隱村何事能詩杜陵老
也頻騎叩富兒門

江上雨中

江漲隨漚欲到門
濕雲依樹易黃昏
幽居常日無來客
何況瀟瀟雨滿林

客館夜見亮師畫上有余呂二山人詩

上人圖畫故人詩
相見燈前夜雨時
無限雲山與烟樹
總含秋色是相思

海上逢王常宗雨夜同宿陳氏西軒

故人散盡獨君存
風雨相逢海上村
尊酒飲闌言不盡
更留餘燭照黃昏

過北莊訪友

淺水平沙凍鴨眠
秋聲吹過石橋邊
尋君兼得尋詩興
野樹江雲欲雪天

題畫

落日青山影在沙
鏡湖波淨遍荷花
雲間樹底參差屋
借問誰家是賀家

得故人書知未入京因寄

曾約春深到鳳臺
君今不到只書來
滿緘離恨牀頭放

一度相思一展開

題王翰林所藏畫蘭

春到懷王舊渚宮
沙棠舟去水煙空
孤叢不有幽香發
應沒江邊百草中

不見花

看花無計作閒身
塵土餘杭暗度春
不見花開莫惆悵
花飛還得免愁人

錦帆涇

水繞荒城柳半枯
錦帆去後故宮蕪
窮奢畢竟輸漁父
長保秋風一幅蒲

楓橋

畫橋三百映江城
詩裏楓橋獨有名
幾度經過憶張繼
烏啼月落又鐘聲

烏鵲橋

烏鵲南飛月自明
恨通銀漢水盈盈
夜來橋上吳娃過
只道天邊織女行

兩妓

李娟張態兩嬌姿傳得香名在白詩當日樽前漫歌舞
使君家自有楊枝

短簿祠

下馬空林間廟扉衣冠寂寞掩塵幃不能復使桓公怒
莫怪年來祭客稀

聞王翰林使蕃

碎葉城邊積雪明彈箏峽水遠人行已聞贊普知臣順

不似前朝作舅甥

大全集卷十七

欽定四庫全書

大全集卷十八

明 高啟 撰

七言絕句

寄雲間朱國史嘗同宿左掖約至江上見訪

風雪京華憶舊逢
候朝同聽鳳樓鐘
還鄉何事翻離阻
春樹春雲隔九峯

其二

曾期訪舊到江沙惆悵參差過落花大樹村中休重問
野人求食已移家

宣和所題畫

御翰親題賞畫工疎枝野鳥怨秋風那知回首宣和殿
物色淒涼與畫同

題張太常金華白玉山房圖

石氣春生化白雲滿林瓊草卧羊羣太常他日歸來日
身老應同萬石君

次韻遜菴春日漫興

春事匆匆過海棠只愁春去欲顛狂
雜英滿地憑誰拾
合作熏爐百和香

送徐山人浩師還郭

欲共歸舟懶入城再三難判別時情
聊題詩卷投君袖
相伴秋江此日行

其二

客巾僧衲影翩翩同逐秋風上別船
賴得江帆無樹隱

相望直到暮城邊

和遜菴尋舊偶不直效香奩體

揚州夢斷十三年
底事猶存未了緣
不見擁鬟簾下立
斷腸騎馬過門前

其二

曾看梳頭傍玉臺
後堂春曉翠屏開
重尋未省雙文去
只道羞郎不出來

東丘蘭若見枇杷

落葉空林忽有香疎花吹雪過東牆居僧記取南風後
留箇金丸待我嘗

夜雨

不是羈人是木腸怕愁不敢易思鄉醉來獨滅青燈卧
風雨從教滴夜長

題畫

滿壑春陰滿澗苔茶煙起處薜帷開山童頻報敲門客
總為催詩索畫來

紅梅

春暈冰綃倚竹低羅浮却似武陵溪詩人從此來相覓
雪滿空山不復迷

瓶梅

竹外相逢見素花手攜數朶喜還家雨窓今夜無明月
暫託寒燈照影斜

池亭對竹

秋陰弄色護池亭羣玉山橫翡翠屏鳴鶴迎風時一唳

先生高枕夢初醒

題三香圖

羅浮洛浦與瀟湘三處離魂一本香夢斷月明秋渺渺
縞衣何似翠裙長

西山幻住期看梅花雨雪不果

詩人本似道人閒偶負幽期不出山只有梨花舊時夢
夜隨明月到林間

其二

梅花宜向雪中看
履滑翻愁雪未乾
惆悵山房深竹裏
一樽誰與破春寒

其三

翠竹休啼怨不來
滿林風雪滿身苔
此花不是繁華種
只合空山獨自開

題桂花美人

桂花庭院月紛紛
按罷霓裳酒半醺
折得一枝攜滿袖
羅衣今夜不須熏

雪中喜劉戶曹見過

滿城春雪禁花開
愁對寒窓欠酒盃
喜子遠能來慰我
扁舟不肯過門回

春暮西園

綠池芳草滿晴波
春色都從雨裏過
知是人家花落盡
菜畦今日蝶來多

雨中閒卧

牀隱屏風竹几斜
卧看新燕到貧家
閒居心上渾無事

聽雨唯憂損杏花

其二

青氈素榻小窓空
慙愧安眠感歎窮
多少人愁泥滑滑
曉衝風雨客途中

晚陪張水部過西橋隔城望見諸山

晚上西橋送客行
隔城遙見衆山晴
望山還恐山相笑
坐守書幃不出城

送李丞之歸安

苔花微雨落秋汀一路青山棹幾停
預喜哦詩無俗吏
兩松相對縣丞廳

春日憶江上

柳下春潮沒舊磯草堂猶在掩荆扉
如今歸夢休為蝶
化作輕鷗度水飛

金徵士留宿江館阻雨連夕

落花風急野無舟喜為茅齋幾日留
却愧江邊春酒薄
不能慰予客中愁

其二

莫辭同宿掩書幃
兵後蕭條故舊稀
預恐明朝風雨歇
滿江春水送君歸

江館夜雨

尋常夜雨睡冥冥
底事今宵只自醒
一枕蕭騷孤獨暗
此聲元在客中聽

田舍夜春

新婦春糧獨睡遲
夜寒茅屋雨來時
燈前每囑兒休哭

明日行人要早炊

畫夫

獨兒初長尾
茸茸行響金鈴細
草中莫向瑤堦吠
人影
羊車半夜出深宮

登白蓮閣貽幼文

思君曾此望西州
誰信歸來得共遊
只是當時舊山水
如何重看不勝愁

讀周記室荊南集

生別猶疑不再逢
楚天雲樹隔重重
愁來讀盡荆南策
風雨空齋掩暮鐘

贈真上人

花下攜琴見此僧
自言開法在金陵
十年江海遊應遍
老去空山對一燈

寄沈侯乞貓

許贈狸奴白雪毛
花陰猶卧日初高
將軍內閣元無用
自有牀頭却鼠刀

青城先生戴笠圖

暫脫朝冠白髮輕
南村羣犬莫相驚
行吟不覺逢山雨
但聽瀟瀟葉上聲

夢歸

何事頻頻夢裏歸
只緣未慣客天涯
覺來不見家人面
恰似前朝始別時

其二

忽夢還家上楚船
來時舊路只依然
家人不識關山遠

有夢何因到我邊

蜀山書舍圖

山月蒼蒼照烟樹
碧浪湖頭放船去
隔林夜半見孤燈
知是幽人讀書處

寒夜逢徐七

松下柴門密雪封
故人驚喜夜相逢
明朝歸棹還當別
莫聽楓橋寺裏鐘

題虞文靖公墨蹟後

清朝文雅孰稱雄我已生年後此公今日亂離江海上
獨看遺墨涕秋風

虎丘

望月登樓海氣昏劍池無底鎮雲根老僧只恐山移去
日落先教鎖寺門

逢故人子

道傍忽見為躊躇流落饑寒喪亂餘久客無人解相念
傷心思廣絕交書

題道上人畫梅

笛裏寒梢蕊自開
幾年風雨不生苔
山窓夜半禪初定
應喜無香觸鼻來

衍師以懷幼文詩見寄因次其韻

題詩為我謝湯休
莫作人間遠客愁
未報歸期須記取
松陵江上鱸膾秋

題遜菴墨菊

獨留鐵面傲霜遲
秋蝶來尋莫自疑
須信陶翁醉歸後

西風塵土滿東籬

丁孝廉約中秋泛舟予過婁東竟留飲孫卿池

上

擬向江潭夜放舟却成騎馬習池遊但逢有酒皆堪醉
月色初無兩漾秋

春日次北郭故人寄韻

風多舟小滯歸人飛絮茫茫暗晚津酒滿壚頭花滿店
今年不見洛陽春

讀半山絕句有感因效其作

寺裏園中總倦行
閒眠看得燕巢成
豈無酒伴同騎馬
落日風吹花滿城

立春試筆

九十日春今日始
春盤春勝巧同新
從今日日尋春去
似我閒人有幾人

薔薇花

花葉林中絳藥開
窮陰不道艷陽回
空房雨裏看如笑

應喜今朝有客來

元夕聞城中放燈寄諸友

江邊殘雪閉寒扉坐戀梅花未解衣
却憶今宵滿城月看燈人醉踏歌歸

次杜二彥正韻

孤榜逍遙欲入城柳風莎雨暗江程
煩君別後殷勤記莫更逢人道我名

得袁卿書知赴湖廣

聞君去歲客昇州近得書來却倍愁
自說去程今又遠望鄉應上武昌樓

過保聖寺贈隆上人

湯公寺子陸公鄰杞菊畦荒夜雨頻
莫訝相過偏不厭白頭禪客是詩人

讀徐七北郭集

一卷忻看故友詩詩留人去喜還悲
西窓夜雨燈前讀不似連牀對咏時

題理髮美人圖

桐風朝動內園枝
吹亂花前髮幾絲
石後理梳羞未出
怕人猜是倦妝時

託流人寄書家兄

不遇流徒謫戍邊
家書那得去人傳
今朝信發何時到
路隔鵠原有幾千

和婁秀才看梅

聞將瘦影伴吟身
水際黃昏竹外春
莫訝此翁偏賞戀

愛梅自古屬幽人

行樂

冠觸花梢露濕衣
曉因行樂到南圻
日高霧散春江曲
綠滿平田雉子飛

寒食逢杜賢良飲

楊柳無煙江水長
鄰家風雨杏觴香
逢君共把金陵酒
忘却今朝在異鄉

晚過清溪史言隋人殺張麗華於此

王謝池臺兩岸空
水禽爭哢夕陽中
麗華妖血流難盡
化作荷花別樣紅

黃荃子母兔

陽坡日暖眼迷離
芳草春眠對兩兒
誰道姮娥曾作伴
廣寒孤宿已多時

吳別駕宅聞老妓陳氏歌

白髮相邀出後廳
莫辭為唱雨霖鈴
如今人盡憐年少
誰肯同來特地聽

出郭舟行避雨樹下

一片春雲雨滿川
漁叢欲借苦無緣
多情水廟門前樹
遮我孤舟半日眠

過湖舟中望寺

出浦平波忽遠開
隔湖煙樹有樓臺
歸舟未得尋僧去
空聽鐘聲寺裏來

江上晚歸

渺渺雙鳬落晚沙
一江秋色艷明霞
逢人不用停舟問

大樹村中即我家

題瀑布泉

千山雲頂一泉飛
仰面時驚雨濕衣
彷彿香爐峰下看
滿溪紅葉訪僧歸

美人圖

鞦韆庭院閉青春
背立誰曾見得真
莫道不言思憶事
欲言還說與何人

春暮

春寒樓上下簾齊鵲鳩偏臨客耳啼淡月殘燈天欲曉
故園歸路夢中迷

深院

風細桐花落井欄池荷新長大如盤閉門無客搖鈴索
半篋閒詩讀易殘

春睡圖

妝殘嬌睡帶餘醒鸚鵡當窓不敢驚誰信上陽宮內女
一春愁絕夢難成

題芭蕉士女

秋宮睡起試生羅
閒向芭蕉石畔過
怪底早涼欺匣扇
夜來葉上雨聲多

題董卿圖

花落吳王故苑西
客亭風雨聽鶯啼
今年又負行春約
畫裏看山不忍題

題趙魏公馬圖

校尉當年執策迎
千金遠購貳師城
一歸天廐嗟空老

立仗元來不用鳴

題妓像

不見秋娘今幾年
楚雲湘雨思悠然
月明樓外天如水
猶憶梁州第二篇

和王畊雲與愚菴倡和詩

灌花移石不辭勤
苔潤流泉雨後新
一塢綠楊雖夫靜
老來欣作太平人

其二

欲望城西禮白雲
數峰蒼翠晚嶙嶙
誰知邂逅東歸客
亦是香山社裏人

夢余唐卿

路隔城臯萬里關
何由得見故人還
燈前夢裏匆匆見
猿叫楓林月在山

離江館一月有感

憶得離家一日期
天邊明月半圓時
遙知此夜閨中望
比著他宵分外悲

過湖南舟中卧作

野客分攜水店前
浪平舟穩稱酣眠
午雞啼處前村近
過盡平湖幾曲天

疎竹三禽圖

棘枝疎瘦竹枝低
三鳥寒多每並棲
月落山窓秋夢斷
不知誰箇最先啼

見花憶故園

春色先從天上來
花枝盡發鳳凰臺
不知別後鄉園樹

寂寞書窓開未開

贈杜進士兒端

骨琢清冰目剪波
生兒若此豈須多
杜郎還作真男子
愧我無才為作歌

其二

不貪梨栗自相親
識是君家舊友人
更待十年應長大
功名當見太平春

城南謾興

春冷園林未到鶯初晴稍稍綻山櫻懶夫不負東風意
也起尋芳郭外行

其二

錢墅韓園處處池盡多芳草少花枝眼看新第皆蕪沒
何況將軍出許時

題張雲門畫竹

臨池書罷換鶯文餘墨猶堪寫此君一段湘娥廟前意
淋漓秋雨共秋雲

題松雪翁臨祐陵草蟲

宣和遺墨畫難工
唯有王孫筆意同
莫問吳宮與梁苑
一般草露覆秋蟲

巨然小景

隔溪山閣映秋開
坐久鐘聲度水來
遙指石橋村樹杪
一僧歸處是天台

中秋無月無酒

桂樹香寒掩畫樓
江雲黯淡蔽中秋
道人莫喚嫦娥出

照見空樽却轉愁

茆翁畫雙竹

不學簀簞滿谷栽
兩竿斜拂楚烟開
應緣茆叟吹橫玉
喚得雙飛碧鳳來

卧病夜聞鄰兒讀書

月淡梧桐雨後天
伊吾聲在北窓前
誰知鄰館無兒客
病裏聽來轉不眠

題紅拂妓

花枝不鎖後堂春
夜半長安旅邸貧
棄去老奴從此客
可憐小妓亦知人

柳塘飛燕

身輕不奈晚多風
春盡迴塘落絮空
楊柳陰迷三十里
畫樓何處捲簾櫳

滾塵馬圖

千里歸來苜蓿春
五花和汗滾香塵
青絲暫解從天性
多謝黃門老圉人

仙山樓觀圖

霧閣宵閒脈望飛
月明露重濕銖衣
仙人莫入芙蓉館
花暗迷人不得歸

春陰

風雨將殘雪又來
春陰二月未能開
紅花白蕊都妨却
只有青青一院苔

送僧震赴京省師

孤雲飛傍五雲遙
京國尋師去興饒
明日春寒江上路

雪花應雜雨花飄

題徐熙三蟲圖

粉蝶黃蜂各冶心
逐香窺艷競相尋
南園雨過紅芳歇
輸與鳴蜩占綠陰

題荔枝練帶

雨後蠻枝錦果肥
華清貢罷驛塵稀
山禽自繞枝頭啄
疑是宮中舊雪衣

題陸稼

風送書聲出晚林始知隱士在雲深抱琴入谷那辭遠
欲覓幽人一賞音

題許瀾伯三蟲圖

蜜脾未滿報衙頻蠹化初成傅粉新誰道爭花羣隊裏
長吟還有獨清人

閶門舟中逢白範

十載長嗟故舊分半歸黃土半青雲扁舟此日楓橋畔
一褐秋風忽見君

田家慶壽圖

花滿茅堂映彩衣
開門曉放鶴雛飛
鄰翁壽畢共扶醉
恰似春來社飲歸

春晚過茶磨西崦

一塢茶煙隱翠微
漁樵來慣客來稀
溪頭樹暗飛花盡
初聽人家響杼機

十二月十七日夜偶成

一牀詩思繞梅花
月墮西窓欲起鴉
可是年來無遠志

夢魂中夜不離家

聞諸友遊城北女冠院看杏花

聞踏春晴覓彩霞
鳳笙吹向女仙家
劉郎醉後殷勤看
不是玄都觀裏花

雨夜偶讀王待制詩

客窓疎竹雨淒淒
把卷燈前讀舊題
此日殷勤如會面
不知君在夜郎西

池上納涼

畫欄斜度水螢光
荷葉荷花各有香
團扇不搖風露下
秋應先借一宵涼

客舍春暮

酒醒閒寫送春詩
細雨殘花尚一枝
莫向天涯望芳草
客愁多似去年時

四皓圖

高山深谷自悠哉
何事猶思太子來
擬向秋風歌一曲
紫芝黃鵠總堪哀

題湘君圖

悵望南巡竟不還
淚和湘雨暮斑斑
須知竹死愁方盡
莫恨秦人便赭山

倪元鎮墨竹

倪君好畫復耽詩
瘦骨秋來似竹枝
前夜夢回如得見
紙窓斜影月低時

王架閣家畫馬

草草髯奴紺綠衣
王家好馬說新肥
解鞍閒立斜陽裏

應是城南賭射歸

己酉初度

時年三十四

風雨空齋誦蓼莪
今年初度客中過
人生七十尋常壽
未過還憐一半多

過北塘道中

未得看春愁不禁
此日聊復試幽尋
行人入村花宛宛
吠犬隔水樹深深

其二

春水滿田如一湖入田放艇看鳶雛女郎祠下野花雜
老子門前沙樹孤

其三

苦欲看春春色稀亂後何處有芳菲晚鶯啼歇野寂寂
雙樹家邊人獨歸

其四

渺渺一逕兩陂間楊柳初發水潺湲驚魚忽散人影近
啼鳥來時春意閒

夜雨江館寫懷

愁解尋人不得辭
小窓疎竹雨來時
江湖今夜全家客
猶勝飄零兩處思

其二

漠漠春寒水遶村
有愁無酒不開門
青燈畫角黃昏雨
客共梅花併斷魂

讀韋蘓州詩

掃閣焚香畫卷帷
綠槐疎雨夏初時
客憂何物能消遣

一帙蘓州刺史詩

送丁孝廉之錢塘就簡張著作方貞外

江邊同客亂離餘
速客那堪近歲除
若見故人詢旅況
知君解說不煩書

金徵士玟雨中見過留宿

夜窓同聽雨中猿
風物淒涼異故園
舊事堪愁今懶說
相看不是解忘言

東臯林下

荒徑空林落葉平尋常唯有野人行如何授簡梁園客
詩句時來此處成

遊幻住精舍

寒扉斜向竹間推此日重來是幾迴行遍空林僧不見
慰人憐有一枝梅

效香奩

青瑣初空別恨長繡茸留得唾痕香簾前月出無人拜
只有鞦韆影過牆

其二

開過東窓百葉桃
琵琶塵滿縷金槽
欲呼小字敲妝閣
誰出相迎放剪刀

江上逢舊妓李氏見過

玉筍紅燭艷春羅
慣向高堂聽汝歌
今夕相逢為重唱
孤舟江冷月明多

其二

多謝停舟共一卮
石州歌罷各低眉
南園舊日同聽客

零落如今剩有誰

其三

誰識能歌舊散聲
愁中聽處尚分明
玲瓏酒罷休催去
月落江潮尚未平

其四

平常歌舞不能閒
多在青春甲第間
借問年來還到否
朱門風雨幾家關

九月八日對菊

預向籬邊把一盃黃花多意已能開不憂風雨明朝阻
懶逐時人鬪折來

舟行晚過張林

望山幾欲去尋幽此日雖來不暇遊一棹黃昏過山下
疎燈絡緯滿林秋

送葉山人

歲晚麻衣冒雪寒高歌欲去醉長安山瓢行負知何有
半是詩丸半藥丸

冬盡無雪連日大風苦寒

枯桑鳴曉北風乾舊歷闌珊欲罷看幾日凍眠猶望雪
野人憂麥敢憂寒

慰徐參軍喪子

天上麒麟去莫羈千秋亭上夕風悲勸君不用情鍾甚
即是當年未有時

醉後贈張架閣歸自京師

燕山雪灑虎皮韉萬里歸來動隔年莫說中原成敗事

相逢且共酒家眠

看梅漫成

江草初生江水流
便覺春色惱人愁
雪晴家家叩門去
不見梅花應不休

其二

江邊寺裏一梅樹
幾度勞人相候開
無情今日未肯發
有興明朝還看來

其三

野人不省愛梅好棄在荒籬荆棘邊
細雨東風欲零落
我來相見一潸然

夜至陽城田家

東津渡頭初月輝南陵寺裏遠鐘微
主人入夜門未掩
蒲響滿塘鶩鴨歸

送林生往海上

藥囊詩卷又辭親風雨孤舟渡晚津
此日遠游君莫怨
亂離無限別家人

贈醫師徐亨甫

錄得龍君舊獻方
杏花春雨閉山房
病家幾度來相覓
林下遙聞煮朮香

慰人悼亡

朱字瑩篋委網塵
月明不見理絲人
鏡臺窓下櫻桃樹
應是當時折剩春

杏園圖為沈日新先生題

絳雪紛紛滿翠條
扣門都是病家邀
如今不用施方藥

聞得花香疾自消

閏三月有感

非關騎馬踏塵埃
病眼昏昏自懶開
江上酒徒應共笑
經春不作看花來

其二

綠樹殘鶯偶一鳴
聽來方解憶山行
今年不是逢餘閏
已過春光半日程

癸卯九日

酒熟如何菊未開
小園荒徑獨徘徊
不隨賓客登高去
只恐愁因望遠來

題畫送人歸觀

相望益遠益傷神
落葉浮雲暗度津
底事過江柔櫓急
故鄉知有倚門人

雲巖東院

古寺閒窓映竹開
雨聲初斷鳥聲來
春風似念無花看
遠送飛紅到硯臺

管夫人墨竹

晨開妝鏡有青鸞
寫得當年舞影看
零落綵雲何處夢
鷗波亭上正春寒

荅王仲廉

我遊山寺未能迴
君卧園廬不肯來
惆悵款冬花樹下
一樽今日共誰開

吳王井

曾聞鑑影照宮娃
玉手牽絲帶露華
今日空山僧自汲

一餅寒供佛前花

消夏灣

涼生白苧水浮空湖上曾開避暑宮清簟疎簾人去後
漁舟占盡柳陰風

雞陂

吳王不解報朝盈空養鳴雞滿別城畢竟餘杭西走日
五更誰唱出關聲

古酒城

酒城應與酒泉通
長夜君王在醉中
兵入館娃猶未醒
越人宜賞釀夫功

三高祠

祀范蠡張翰陸龜蒙

功名不戀上將軍
一舸歸遊笠澤雲
載去西施豈無意
恐留傾國更迷君

其二

洛陽忽憶膾鱸肥
便趁秋風問釣磯
猶恨季鷹歸未早
不邀二陸共船歸

其三

鴨羣無食水田荒風雨孤蓬載筆牀
猶有新詩驚太守
醉中揮翰木蘭堂

織女廟

農祭頻來水廟扉銀河東望失星輝
天孫秋夜應相憶
一去人間竟不歸

大全集卷十八